



Broj: 05/7-39-1-1454-2/22

Sarajevo, 18. 11. 2022.

## ZAPISNIK

### 2. sjednice Vijeća nacionalnih manjina BiH, održane 15. 12. 2022.

Sjednica Vijeća nacionalnih manjina BiH počela je u 17.30 sati<sup>1</sup>.

Sjednici su prisustvovali: Davor Ebner, Skender Mustagrudić, Franjo Rover, Ernest Grin, Saša Mićin, Todorka Jovanović, Velibor Kuvač, Dejan Piotrovski, Mujo Fafulić, Violeta Džolan, Igor Kotjelnikov, Mihal Hemun, Danijel Štefek, Dragica Tešić, Hakan Varan i Miroslav Bobrek.

Sjednici, iz opravdanih razloga, nisu prisustvovali: Zamire Sokoli-Begović i Željko Vaško.

Sjednici su, također, prisustvovali: Saliha Đuderija, pomoćnica ministra za ljudska prava i izbjeglice BiH - Sektor za ljudska prava, Aleksandra Jarić, šefica Odjela za zaštitu prava i saradnju s nacionalnim i drugim manjinama, vjerskim zajednicama i nevladinim organizacijama; te Aida Kreho, Enver Bogučanin, Stojanka Šarović i Bojan Brezo iz Sekretarijata Parlamentarne skupštine BiH.

Sjednicu je sazvaio predsjedavajući Vijeća nacionalnih manjina Mujo Fafulić.

---

<sup>1</sup> Druga sjednica Vijeća počela je s 30 minuta zakašnjenja u odnosu na zakazani početak (u 17 sati), zbog najavljenog kašnjenja sedam članova.

Za sjednicu je predložen sljedeći:

### **D N E V N I R E D**

1. Razmatranje Prijedloga zapisnika konstituirajuće sjednice Vijeća nacionalnih manjina BiH;
2. Razmatranje Nacrta plana rada Vijeća nacionalnih manjina BiH za 2023. godinu;
3. Tekuća pitanja:
  - a) Dogovor o izradi Nacrta izvještaja o radu Vijeća nacionalnih manjina BiH za 2022. godinu,
  - b) Dogovor o pristupanju izradi prijedloga za izmjene i dopune Poslovnika Vijeća nacionalnih manjina BiH,
  - c) Razmatranje Inicijative za povećanje iznosa sredstava za realizaciju Akcionog plana BiH za društvenu inkluziju Roma i Romkinja za period 2021 – 2025. godine, akt broj: 03/6, 05/7-39-3-1789/22 od 10. 11. 2022, podnosilac: Kali Sara – Romski informativni centar.

Na prijedlog predsjedavajućeg Muje Fafulića, članovi Vijeća jednoglasno su odlučili na dnevni red dodati novu tačku kao drugu tačku dnevnog reda - 2. Usmena informacija o raspisivanju Javnog poziva za dodjelu sredstava granta udruženjima nacionalnih manjina od Ministarstva za ljudska prava i izbjeglice BiH, te usvojili dopunjeni dnevni red.

#### **Ad. 1. Razmatranje Prijedloga zapisnika konstituirajuće sjednice Vijeća nacionalnih manjina BiH**

Nakon uvodnih napomena, sekretarka Zajedničke komisije podsjetila je na pisanu primjedbu na Prijedlog zapisnika koju je dostavio Željko Vaško, a koja se odnosila na navod da je 'Željko Vaško predložio Franju Rovera za predsjedavajućeg Vijeća', te potrebu da se izvrši popravka na način da je prijedlog dao Saša Mićin.

Uz spomenute izmjene Zapisnik je jednoglasno usvojen.

#### **Ad. 2. Usmena informacija o raspisivanju Javnog poziva za dodjelu sredstava granta udruženjima nacionalnih manjina od Ministarstva za ljudska prava i izbjeglice BiH**

U okviru ove tačke dnevnog reda Saliha Đuderija, pomoćnica ministra za ljudska prava i izbjeglice BiH u Sektoru za ljudska prava, informirala je Vijeće da sredstva planirana grantovima za podršku nacionalnim manjinama u 2022. godini ne mogu biti iskorištena, s obzirom na to da

Vijeće ministara nije održalo sjednicu na kojoj je trebala biti usvojena odluka o raspisivanju javnog poziva za dodjelu tih sredstava.

Također, pomoćnica ministra upoznala je članove Vijeća da će Ministarstvo za ljudska prava i izbjeglice BiH, u saradnji s Vijećem Evrope u BiH, a u okviru Projekta *Horizontal Facility za Zapadni Balkan i Tursku*, u narednom periodu održati sastanak s Vijećem nacionalnih manjina BiH po pitanju pristupanja izradi izmjena i dopuna Zakona o zaštiti prava nacionalnih manjina u BiH, te da će se pristupiti uspostavi aktivnije saradnje između vijeća nacionalnih manjina na svim nivoima vlasti u BiH, s ciljem promocije kulture, tradicije, jezika i drugih tema.

Informacija je jednoglasno primljena k znanju.

### **Ad. 3. Razmatranje Nacrta plana rada Vijeća nacionalnih manjina BiH za 2023. godinu**

U raspravi o ovoj tački dnevnog reda učestvovali su: Igor Kotjelnikov, koji je predložio da se održavanje zajedničkih sastanaka s Ministarstvom za ljudska prava i izbjeglice - koji je planiran za juli/august, planira u prvom kvartalu; Franjo Rover, koji je predložio intenzivnije provođenje aktivnosti kojima će se nadležne institucije potaknuti da se intenzivnije zalažu za rješavanje problema nacionalnih manjina; Saša Mićin, koji je predložio provođenje aktivnosti na istraživanju o zastupljenosti predstavnika nacionalnih manjina u tijelima gdje oni na to ostvaruju pravo, te Mujo Fafulić koji je naveo da u narednom periodu treba intenzivirati rad Vijeća, organizirati sastanke s predstavnicima Vijeća ministara BiH i vršiti bolju promociju u medijima.

Konačno, dogovoreno je da svi članovi, koji to žele, dostave dodatne sugestije do 10. januara 2023. godine.

### **Ad. 4. Tekuća pitanja:**

#### **a) Dogovor o izradi Nacrta izvještaja o radu Vijeća nacionalnih manjina BiH za 2022. godinu**

Članovi Vijeća su nakon rasprave, u kojoj su učestvovali Dragica Tešić i Velibor Kuvač, a u kojoj je istaknuta sugestija za drugačijom tehničkom obradom teksta izvještaja o radu – s ciljem jasne podjele na aktivnosti 'tehničkog sastava Vijeća' do 27. 7. 2022. i Vijeća u novom sazivu, te napomene o urađenom po pojedinim aktivnostima Vijeća navedenim u izvještaju, dogovorili da se

date sugestije ispoštuju, te da svi članovi, koji to budu smatrali potrebnim, dostave dodatne sugestije do 10. januara 2023. godine.

**b) Dogovor o pristupanju izradi prijedloga za izmjene i dopune Poslovnika Vijeća nacionalnih manjina BiH**

Nakon uvodnih napomena, uslijedila je rasprava u kojoj su učestvovali Velibor Kuvač, Dragica Tešić i Franjo Rover, te je zaključeno da će se o prijedlozima za izmjene/dopune Poslovnika razgovarati na posebnoj sjednici, a da svi članovi - koji imaju prijedloge izmjena/dopuna – njih i dostave u pisanoj formi do 31. januara 2023. godine.

**c) Razmatranje Inicijative za povećanje iznosa sredstava za realizaciju Akcionog plana BiH za društvenu inkluziju Roma i Romkinja za period 2021 – 2025. godine, akt broj: 03/6, 05/7-39-3-1789/22 od 10. 11. 2022, podnosilac: Kali Sara – Romski informativni centar**

Predsjedavajući Vijeća informirao je članove da je o predmetnoj inicijativi obavio razgovor s Dervom Sejdićem, predsjednikom Udruženja „Kali Sara“ i obavijestio ga da Vijeće nema mogućnost da povećava sredstva za realizaciju Akcionog plana BiH za društvenu inkluziju Roma i Romkinja za period 2021 – 2025. godine, ali da svakako podržava udruženje u njihovom radu. Informacija je jednoglasno primljena znanju.

**d) Novčana naknada za pružanje administrativne, stručne i tehničke pomoći Vijeću**

Predsjedavajući Vijeća predložio je da se na teret budžeta Vijeća nacionalnih manjina BiH mjesečno isplaćuje naknada zaposlenim u Uredu sekretara Zajedničke komisije za ljudska prava BiH za pružanje administrativne, stručne i tehničke pomoći Vijeću.

Navedeni prijedlog jednoglasno je usvojen.

**e) Izrada dopisa za Predsjedništvo BiH, Vijeće ministara BiH, Ministarstvo za ljudska prava i izbjeglice BiH i Ministarstvo civilnih poslova BiH s ciljem osiguranja dovoljnog iznosa sredstava grantu u Budžetu institucija BiH i međunarodnih obaveza BiH**

U raspravi o ovoj tački učestvovali su Velibor Kuvač, Dragica Tešić i Dejan Piotrovski.

Dogovoreno je da se upute dopisi prema Ministarstvu civilnih poslova za razdvajanje grantova, prema Ministarstvu za ljudska prava i izbjeglice za povećanje grantova za nacionalne manjine koji se konstantno smanjuje od 2018. godine, prema Predsjedništvu BiH i Vijeću ministara BiH s molbom da se u Budžetu institucija Bosne i Hercegovine i međunarodnih obaveza Bosne i Hercegovine za 2023. godinu osigura dovoljan iznos sredstava namijenjen nacionalnim manjinama.

Na kraju sjednice sekretar Zajedničke komisije za ljudska prava Aida Kreho kazala je da do 10. januara 2023, osim usmenih sugestija koje su date, mogu poslati i pismene sugestije na Plan rada i Izvještaj o radu, a što se tiče Poslovnika prijedlozi se mogu slati do kraja januara. Sljedeća sjednica bit će zakazana krajem januara i na njoj će se razmatrati Izvještaj o radu i Plan rada sa svim sugestijama koje stignu do 10. januara 2023. godine, a zatim će se u februaru organizovati posebna sjednica Vijeća na kojoj će se raspravljati o Poslovniku.

Sjednica je završena u 18.45 sati.

**Sekretar**  
**Zajedničke komisije za ljudska prava**  
**Aida Kreho**

**Predsjedavajući**  
**Vijeća nacionalnih manjina BiH**  
**Mujo Fafulić**